

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. औंदी 3 मार्च थमां शुरु होने आहले जम्मू-कश्मीर विधानसभा दे बजट इजलास लेई तैयारियां जोरें-शोरें कन्नै चलै करदिआं न।
2. बजट इजलास कोला पैहले विधानसभा दे स्पीकर अब्दुल रहीम राथर होरें अज्ज सब्भनै पार्टिएं दी इक महत्वपूर्ण बैठक सद्दी दी ऐ।
3. जंगलात ते पर्यावरण मंत्री जावेद अहमद राणा होरें विलुप्त होने दी कगार उप्पर पुज्जी दिएं वन्य जीवें दिएं प्रजातिएं दे संरक्षण दी जरूरतें उप्पर जोर पांदे होई इ'नें प्रजातिएं दी गिनतरी दा पता लाने दे निर्देश जारी कीते।
4. कैबिनेट मंत्री सकीना इतू होरें जम्मू-कश्मीर मेडिकल सप्लाइज़ कारपोरेशन लिमिटेड दे कम्मैकाजै दा जायजा लैता ते प्रदेश च दवाईं दी बंड आहली प्रणाली च पारदर्शिता जकीनी बनाने दे निर्देश दिते न।

<><><><><><>

LA Budget Session

जम्मू-कश्मीर विधानसभा दे औंदी 3 मार्च थमां शुरु होने आहले बजट इजलास लेई तैयारियां जोरें-शोरें चलै करदिआं न। आकाशवाणी दे जम्मू संवाददाता दी रिपोर्ट मूजब, एह इजलास

उपराज्यपाल हुंदे अभिभाषण कन्नै शुरु होने दी मेद ऐ जेहड़े औंदे माली बरे लेई सरकार दा नजरिया पेश करडन। इस इजलास दे मद्देनजर जम्मू विधानसभा परिसर दे आले-दोआले सुरक्षा बवस्था निगगर करी दिती गई ऐ ते होरनें तैयारिएं गी बी तोढ़ चाढ़ेआ जा करदा ऐ। एह बजट जम्मू-कश्मीर लेई मता महत्वपूर्ण होग ते एह बजट नेय समें पर पेश कीता जा करदा ऐ जिसलै जम्मू-कश्मीर प्रशासन ढांचागत विकास, कल्याण कार्यक्रमें ते आर्थिक विकास आहली नीतिएं गी अगगे बधाने बक्खी ध्यान केन्द्रित करै करदा ऐ। 16 अक्टूबर 2024 गी प्रदेश दी सत्ता सांभने आहली ओमर अब्दुल्ला सरकार दा एह पैहला बजट होग।

<><><><><><>

APMLA

विधानसभा स्पीकर अब्दुल रहीम राथर होरें विधानसभा दे बजट इजलास कोला पैहले अज्ज सभनें पार्टिएं दी इक बैठक सद्दी दी ऐ। मेद ऐ जे एह इजलास मता हंगामेदार रेई सकदा ऐ कीजे मुख बरोधी पार्टिएं जि'आं बीजेपी, पीडीपी ते पीपुल्स कांफ्रेंस नै मुखमंत्री ओमर अब्दुल्ला हुंदी अगुवाई आहली सरकार गी घरने दी तैयारी करी रक्खी दी ऐ। दुई बक्खी कांग्रेस पार्टी नै साफ करी दिते दा ऐ जे ओह सत्ताधारी दल दी भ्याल पार्टी ऐ ते मेद ऐ जे ओह सीपीआई(एम) आहला लेखा संतुलन बनाइयै रक्खग। अज्जै लग्गने आहली सभनें पार्टिएं दी बैठक च जेहड़े नेताएं गी साद्दा दित्ता गेदा ऐ उंदे च बरोधी धड़े दे नेता ते बीजेपी विधायक सुनील शर्मा ते सुरजीत सिंह सलाथिया, नेशनल कांफ्रेंस दे अली मोहम्मद सागर ते मुबारक गुल, कांग्रेस दे गुलाम अहमद मीर, पीपुल्स कांफ्रेंस दे सज्जाद गनी लोन, सीपीआई(एम) दे मुहम्मद युसुफ तारीगामी, पीडीपी दे वहीद-उर-रहमान परा ते निर्दलीय विधायक मुजफ्फर इकबाल खान शामिल न।

<><><><><><>

Dy CM-Shivratri

उपमुख्यमंत्री सुरिंद्र चौधरी होरें रजौरी जिले दी बक्ख-बक्ख थाहरें पर कल महाशिवरात्रि दे उपलक्ष्य च आयोजित कई समारोहें च शिरकत कीती। भांबला च आयोजित महाशिवरात्रि दे इक्क समारोह च सुरिंद्र चौधरी होरें जम्मू-कश्मीर च शांति ते समृद्धि लेई प्रार्थना कीती। उनें आखेआ जे एह त्यौहार इस खेतर दी रली मिली दी संस्कृति आस्तै इक्क मजबूत सूचक न जिंदे च सब्भनें समुदायें दे लोक सदियें शा हिस्सा लै करदे न। उनें आखेआ जे असेंगी आपसी भाईचारे ते रली-मिली दी अपनी संस्कृति गी मजबूत करने आस्तै मिली-जूलिये कम्म करना चाइदा।

<><><><><><>

Shiv Khor

महाशिवरात्रि दे पावन पर्व उप्पर मुकामी शिवखोड़ी मंदरै च श्रद्धालुएं दा बड़ा भारी रश दिक्खेआ गेआ। इस मौके पर उत्थे लाए गेदे मेले च लोकें मुकामी व्यंजनें दा बी नंद लैता। डिप्टी कमिशनर विकास कुंडल होरें बी शिवें दे दरबार च मत्था टेकेआ ते सब्भनें दी भलाई-बेहतरी दी कामना कीती। उनें आखेआ जे महाशिवरात्रि दा पर्व भारत दी सगोसार संस्कृति, भाईचारे ते आपसी सम्बोध दा प्रतीक ऐ।

<><><><><><>

India Slams Pak-UNHRC

संयुक्त राष्ट्र दी मनुक्खी अधिकारें सरबंधी काउंसल दे 58में इजलास दी 7मीं बैठका च भारत नै पाकिस्तान दी सख्त निंदेआ करदे होई पाकिस्तान गी अंतरराष्ट्री सहायता पर निर्भर इक

नाकाम मुख्य करार दिता ऐ। संयुक्त राष्ट्र च भारत दे स्थायी मिशन क्षितिज त्यागी होरें जिनेवा च, पाकिस्तान दे नेताएं पर अपने फौजी-आतंकवादी परिसर थमां झूठ फैलाने दा आरोप लाया। उ'नें आखेआ जे जम्मू-कश्मीर ते लद्दाख म्हेशां भारत दा अनचुट्ट हिस्सा बने दे रौहडन। श्री त्यागी होरें इस्लामिक सैहयोग संगठन गी इस्तेमाल करने लेई पाकिस्तान दी निंदेआ कीती ते आखेआ जे एह मंदे भागें आहली गल्ल ऐ जे संयुक्त राष्ट्र दी मनुक्खी अधिकारें सरबन्धी काउंसल दा समें इक ऐसा मुख्य बर्बाद करदा ऐ जेहड़ा अस्थिरता पर पनपदा ते अंतरराष्ट्री मदाद उप्पर निर्भर रौहदा ऐ।

<><><><><><>

DC-Udh. SBDU

उधमपुर दिएं डिप्टी कमिशनर सलोनी राय होरें लौहके बपारिक विकास युनिटें ते बपारिक हेल्प डेस्क दे सदस्यें कन्नै कल इक बैठक लाइयें जिले च मिशन यूथ परियोजना दे तैहत कारोबारें गी मदाद देने सरबन्धी सरिस्ते दी अमल-आवरी च उ'दी भूमिका ते जिम्मेदारिएं बारै चर्चा कीती। डिप्टी कमिशनर होरें प्रतिभागिएं गी दस्सेआ जे इस परियोजना दी कामयाबी कन्नै अमल-आवरी जकीनी बनाने लेई इक कमेटी खडेरी गेदी ऐ। उ'नें इब्बी आखेआ जे हर इक सदस्य गी अपनी भूमिका ते जिम्मेदारिएं दे बारै साफ तौरा पर पता होना लोइचदा ऐ कीजे एहदे राहें गै जिले च युवा परियोजना गी बवस्थित ढंग्गै'नै तोढ़ चाढेआ जाई सकदा ऐ।

<><><><><><>

Udh. JJM

जल जीवन मिशन योजना दे तैहत उधमपुर जिले दे तोलड़ी नाला इलाके च चार पंचायतां पूरी चाल्ली कन्नै पानी आहली सप्लाई दी स्कीमें कन्नै जोड़ी दिती गेइयां न। पेश ऐ इस बारै च साहड़े जिला संवाददाता हुंदी इक्क रिपोर्ट।

.....बाईट.....

<><><><><><>

ते हुन बाकि दिएं खबरें कन्नै कुणाल श्रीवत्स।

Rana Wildlife

जंगलात ते पर्यावरण मैहकमे दे मंत्री जावेद अहमद राणा होरें वन्य जीवें सरबंधी मैहकमे दे अधिकारिएं पर जोर पाया ऐ जे ओह विलुप्त होने दी कगार उप्पर पुज्जी दिएं वन्य जीवें दिएं प्रजातिएं दे संरक्षण लेई नमें-नमें हीलें गी अमल च आहनना जकीनी बनान। मंत्री होरें गलाया जे हाल दे दिनें दरान पुंछ-रजौरी दे इलाकें थमां जिस चाल्ली कन्नै विरले वन्य जीव प्राणिएं दा पता लाया गेआ ऐ, एह मता दिल बधाने आहला ऐ। उ'नें आखेआ जे विलुप्त होने दी कगार उप्पर पुज्जी दिएं वन्य जीवें दिएं प्रजातिएं दे संरक्षण लेई असरदार गैहीं पुट्टियां जानियां लोइचदिआं न। मंत्री होरें अधिकारिएं पर जोर पाया जे ओह ऐसी गतिविधिएं खलाफ सख्त रौंस अपनान जेहिइयां वन्य जीवें ते चपासम लेई खतरा पैदा करदिआं न। राणा होरें घनें जांगली इलाकें च इ'नें विरली प्रजातिएं दा पता लाने लेई फील्ड अमले दी सराहना कीती ते इ'नें प्रजातिएं दी गिनतरी दा पता लाने दे निर्देश बी जारी कीते।

<><><><><><>

Rana-Jakl Shakti

जल शक्ति ते जंगलात मैहकमें दे मंत्री जावेद अहमद राणा होरें कुशल सेवा वितरण ते जल जीवन मिशन गी पीर पंजाल खिते च समेंसिर सबूरा करने पर जोर दिता। मंत्री होरें एह गल्ल कल पीर पंजाल खिते दे अपने दौरे दौरान आक्खी। मंत्री होरें अपने इस दौरे दे दौरान खिते च चला रदे विकास कम्में दी प्रगति, जिंदे च जल जीवन मिशन बी शामिल ऐ, दा जायजा लैता। इस दौरान मंत्री होरें जोर दिंदे होई आखेआ जे पीर पंजाल खिते च पानी दी सप्लाई आहिलयें स्कीमें दे कम्में दी रफ्तार बदाने ते उनेंगी सबूरा करने आस्तै सख्त समें सीमा निर्धारित कीती जानी लोड़चदी ऐ तां जे सब्भनें गी सुरक्षित पीने दे पानी दी उपलब्धता यकीनी बनाई जाई सकै।

<><><><><><>

Sakeena-JKMSCL

सेहत ते मेडिकल शिक्षा मंत्री सकीना इतू होरें कल सिविल सैक्रेटेरिएट जम्मू च इक बैठक लाइयें जम्मू-कश्मीर मेडिकल सप्लाईज़ कारपोरेशन लिमिटेड दे कम्मै-काजें दा जायजा लैता। इस मौके उपपर अधिकारिणं गी संबोधित करदे होई इतू होरें मेडिकल सप्लाईज़ दे निगरान सरिस्ते गी तगड़ा बनाने दी जरूरतें उपपर जोर पाया। एहदे अलावा उ'नें सब्भनें जिलें ते उप-जिला अस्पतालें च मरीजें लेई दवाईएं दी बंड आहली पारदर्शी ते असरदार प्रणाली अमल च आहनने लेई बी आखेआ। मंत्री होरें सब्भनें सरकारी मेडिकल कॉलेजें दे प्रिंसिपलें गी निर्देश जारी कीता जे ओह अपने सरबंधत अस्पतालें च मरीजें गी बंडी गेदी दवाईएं दा पूरा रिकार्ड उपलब्ध रक्खन ते ओकड़ी दवाईएं दे ब्यौरे बी दर्ज करोआन जेहिड़यां उपलब्ध नेई हैन।

<><><><><><>